

Zerga aitortpenari jarriak

I

Urtarrileko aldapan
pobreak herrera
otsaila motza bai,
baina ez lauena
Aste Santuan barau
eta atsedena
otoitz ta penitentzi
luzetan barrena
ta orain patrikara
dator aitortpena.



DANI BLANCO

II

Mekanizatua nahiz
bulegoan barna
lehen kenduak izango
ote du emana?
Ondasunak berekin
oker bat darama:
Sortzen duenarentzat
nekea ta zama
bildu eta banatzen
duenari fama.

III

Sozietateen zerga
gora eta behera
zazpiak bat ez baina
hiruek berbera.
Konpondu ezin eta
eskua PP-ra
bai heldu ere elkar
ulertze betera
Alderdien Legea
hura ez, hauxe da.

IV

Daukanak ematea
ondo da, nik uste
bestek egindakotik
lortu badituzte.
Zeinek ta zenbat eman
arazoak laiste
batzuk enpresei zergak
gutxitzeko eske
nonbait ez da iristen
denentzako beste.

V

Noski ez da xamurra
erremedioa
naturak du ideia
ta gomendioa:
Ur arazoak badu
bere balioa
iturri ta ibaian
nahiko ongi doa
gero tuberietan
beti jariora

VI

Gizarte modernoa
zerbitzuz beteta
bai baina zeinen bizkar?
Non dago oreka?
Batzuk larri, besteak
lasai gerri buelta
baina naturak bere
legea du eta
noizbait iritsiko da
klima aldaketa.